

# 50 onns Televisiun Rumantscha

Ediziun da giubileum cumpara

■ (rtr) **Ils 17 da favrer 1963 è vegnì emess l'emprima emissiun rumantscha, il «Balcun tort». Per il 50avel onn da giubileum ha edì la Chasa Editura Rumantscha per incumbensa da RTR Radiotelevision Svizra Rumantscha ina publicaziun, che mussa cun istorgias, illustraziuns ed intervistas da personas cumpigliadas il svilup e la lavur da pionier fin al medium dad oz.** Quest cudesch descriva il svilup davent dals emprims impuls per realisar ina emissiun rumantscha fin als plans che han manà a las 100 uras emissiuns da televisiun rumantscha annualas d'ozendi. «Quest resultat è stà pussaivel mo grazia a la simbiosia da la cultura e politica, da la scola e societad», uschia *Mariano Tschuor* en il prolog. En 10 chapitels retschaiva il lectur invista a la lavur da lobi per il rumantsch, a la concepziun da las emissiuns, als divers formats d'emissiuns sco era in sguard prospectiv sin l'avegnir da RTR. Il cudesch cuntegna bleras ed interessantas illustraziuns; plinavant chatt'ins las survistas da tuttas emissiuns fin ussa, sco era da tutTAs collavuraturAs e protagonistAs. Il cudesch è per rumantsch; a la fin da mintga chapitel datti ina curta resumaziun per tudestg.

## Istorgia culturala rumantscha

*Madlaina Bundi* ha scrit sco istoricra diversas publicaziuns tar la istorgia sociala ed economica Svizra, tranter auter davart il moviment per la protecziun da la

patria e da la natira, sco era tar la politica da l'ambient e da la cultura en il 20avel tschientaner. Bundi è partenaria e commembra directiva da hier+jetzt, ina chasa editura per cultura ed istorgia a Baden: «Cura ch'jau hai entschet cun il cudesch, hai jau pensà ch'i vegnia ina istorgia mediala, ina istorgia da la televi-

siun per ina minoritad linguistica. Pli profund ch'jau ma fatschentava ed era entras las intervistas èsi vegnì clar per mai, ch'igl è era ina impurtanta part da l'istorgia culturala rumantscha dals ultims 50 onns. Uschè bleras personas han cooperà, uschè bleras istorgias sa splegan enturn ils svilups da las emissiuns.»



Il frontispizi dal cudesch «50 onns Televisiun Rumantscha».